

灌志文徵卷二

傳狀

宋承俸先生傳

韓學潮

昇平之世百物暢茂民遂其生不幸而時際衰晚饑饉荐臻盜賊蜂起則必齊衆力以衛一鄉至於大劫之來失業轉徙舉目無烟爨白骨委郊坰身且不保何有於家明末政亂如絲棼大盜移國獻逆寇蜀尺土無居人此亦莫可如何之勢也宋承俸先生自敘徙蜀西萬死一生而得奠厥攸居殆天有以相之先生屏山人也其先世元泰籍麻城宦蜀上南道卒於官後因家焉先生初爲營弁陞川南總兵以材勇聞嘗以鄉兵破走夷有成績明懷宗時陞見回川適獻賊殘蜀後營伍散佚盜賊滿野孫李蹂躪於滇黔川廣之間僞將王屏藩譚宏窺蜀撫臣提軍相率歸吳氏太保李國英阻兵劍閣烽烟

灌志文徵

卷二 傳狀

四張擾攘三十餘載明事不可爲矣先生挈一戚一僕望屋而居已乃回故郡携眷屬來灌陽住雲橋下鄢家林時地方猶未靖也晝有狂徒餉耕則掠食夜有土匪宅居則勒財謀生豈易哉方先生之爲邊吏以庇民也其功甚偉今來西土締造經營適得中人之產其亦有厚德而食報者歟

先考先妣行述

羅鳳藻

先考智章府君字仲明號慧光其先自南部遷灌四傳而至我祖文炳公善居積生府君與伯父仁章公家日裕府君性摯幼事劉勉齋太夫子比鄰而居請益弗懈祖父治家嚴尤未嘗稍拂意祖母趙太孺人病革衣不解帶者累月焉先妣氏陳恪勤婦職佐府君博堂上歡舉無廢缺府君最友愛伯父寢疾必日往省視鳳藻補縣學生則以出入公門爲戒食餼又禁出保誓不執法乃許珍修鳳修則教之耕福修訓蒙囑以勿誤人子弟宗族鄉人有博

奕者聞府君至輒斂跡其以身教類如此生平好善如不及里中義舉盡力所至所刊善書汲汲以正人心爲務板資不足先妣恆出私積助之有戚因壻不淑欲離婚贈金息訟遂和好如初府君既喜解紛鄉人感化鮮涉訟者府君歿門潘文潘輓云一團和氣深涵養百世流芳作典型蓋紀實也今鳳藻雖得一官而祿不逮親矣傷哉府君享年八十誥封文林郎先妣享年七十九誥封孺人男四女三孫十四女孫九曾孫十七玄孫二葬俱近宅鳳藻等謹述之以俟當代大人先生垂采焉

宋靈巖先生事略

高溥

先生諱履坦字靈巖號雲橋父諱世平原籍楚之麻城始祖承俸宦蜀南後遷於灌五世而至先生秉姿穎異方七八齡時能讀左國諸書卽有微疴亦把卷自樂成童以後於學靡不窮究爲文卽諳理法太夫子竊異之嚴爲擇

灌志文徵

卷二 傳狀

二

師聞中江名士黃梅設帳蒲陽因遣受業黃公見其好學雅重之同學數十人先生獨以高弟稱弱冠舉茂才旋食餼學使評其文有先正典型之譽方先生遊泮時黃公夫婦皆卒無嗣遺一女先生約同人服喪甚哀出金卜宅兆且爲置守塚戶春秋祭掃必躬親至老不廢女適清門每迎至其室禮之如母家者然歸必贈以金先生性方正寡言笑衣冠整潔几席間設浴盆動必盥洗遇疾風迅雷雖夜必興從遊者必教以修身力行冬一裘夏一葛圍講者以鱗次課詩古文詞帙逾寸點竄若飈發頃刻盡數十紙一以諸大家清真雅正之文爲弟子法獲雋者二百餘人選有雲橋塾鈔養正篇及註釋詩文集總二十卷行世歲得修金必分潤諸弟及親族無告者先生貌偉而古廣穎疏髯如覩彝林法器及挹其清論而真氣乃油然溢於言表其事太夫子寢膳必親及疾作先生左右扶持不解帶者閱月卒之日哀毀骨立痛

幾絕者數次祭奠以禮鄉人咸風之待人接物一以慈惠爲心常見有皤然
喘鼻者負於塗爲代之達其所並贈百錢乃去除夕有售物者益其值與之
而不乘其急有行竊館中者陰贈以金終不洩其事其人遂改行道光丙戌
歲猶子煊以春闈罷註銓州判然非先生志也年六十七以明經卒於鄉及
門哀聲震鄰里村父老靄歎隴首者凡數十百輩邑侯周椿園先生聞之歎
曰靈巖卽世文峯頽矣咸豐庚申滇匪至肆焚掠時先生卒幾三十年有賊
渠與衆約曰雲橋先生篤行儒也有敢毀其廬舍者吾手刃之率諸賊羅拜
瞻其遺像而去環村里許賴以不擾先生生平行事類如此隴右牛雪橋先
生任蜀臬時聞其名屢稱之於卸任後遊青城題其碑曰宋靈巖先生之墓
所以闡潛德也遺有大中日義離騷註解評輯國朝及前明文集數十函藏
於家未梓以同治十一年入祀鄉賢

灌志文徵

卷二 傳狀

三

邑令李公傳

佚名

公諱雲繡直隸大明府長垣縣人爲時名進士好讀書不徇時尚幼孤志切
養劉依依不忍仕遵祖母命始赴選來川初任渠縣調繁劇任灌緩賦輕徭
教養躬親民咸安之旣值西征諸務叢脞公上不廢公下不累民從容理之
裕如也丁祖母艱大府愛其才不聽去贈移孝作忠匾以積勞辭職則留之
愈切擢守眉州仍以州印辦灌務力疾視事寢食俱廢竟終於署士民哭之
如喪考妣公以乾隆十年蒞任越四年卒時值軍興而秋毫無犯百姓安堵
古之循良不是過若之何其使吾民能忘之也

高城南先生傳

黃雲鵠

高溥字約齋灌縣人學者稱城南先生予守成都時祈雨屢至灌稔先生賢
汔未見抵建南走書造廬乞言先生慰勉之甚厚還蜀端居其孫茂才履和

奉先生遺意來從予遊因得縷悉先生生平先生無他嗜好惟好學好厲名節好勤民事好吟詠老乃好飲酒飲酣所憂喜必天下大事或載酒遊覽山川慨想古賢達人其先世世帥黎雅曾祖時宰遷灌父萬春以武舉起家至先生乃以文學成進士其肄業錦江也制府某入闈監臨密取高第諸生民先生不署祭酒奇之道光元年舉於鄉乙未通籍分符廣東以母賂太宜人不就養遂不出先是壬午赴試丁外憂終身以未躬親爲恨念及輒泣用是侍養十餘年未嘗跬步離太宜人九十餘猶康強善飲日兩餐必具酒夜靜燈施侍觴啜菽語家常依依若孺子太宜人亦忘其篤老也先生事兄謹撫女弟四人如一慮太宜人憂其貧也陰濟之太宜人九十四無疾而終服除請檄之粵咸豐初年詔舉孝廉方正邑以先生應自粵致書力辭檄攝樂會令改署澄邁澄邁城外不允貿易但允郭內便箕斂也先生至立弛之海民

灌志文徵

卷二 傳狀

四

得小鰮請官勘乃敢出警先生往則見一坡縣亘二里許泥布其巔色黃黑僚從指曰此小鰮也珠膏值金二千請稅幾許先生搖首曰嘻是惡用稅巡去灌澄二載折疑獄無算辛亥除夕或大書七字於儀門曰高明公政事簡明旋調攝崖州崖巖邑也漢黎雜處號難治先生治之數月甚相安同寮異之先生曰何異熟黎慙漢民欺之生黎悍熟黎誘之吾援情酌理以人治之而已故事歲無事則黎有賞廢久矣先生舉行之纏頭裹氈膝行僂而前者數千人戒之曰汝等朝廷好百姓也毋羣飲毋好鬪毋縱火傷人諸黎諾聲雷動歸而邊益安越三年去任海上人不忍其去先生留句曰膏苗甘雨何從降出岫閒雲應早還自是歸志浩然矣渡海北抵省居三月遂以足疾告上游再四挽之不獲贖以金而歸值時弗靖制府曾公檄先生督練三百七十六團先生一以居鄉居官之法參用之未久衆大和攻守畢可時邑令曰

城南先生一語勝吾三令五申矣滇逆竄崇慶州掠分州調團扼截之殺賊多人賊宵遁辛酉賊竄灌過先生宅相戒曰此廣東好官也勿焚擾蓋德望感人如此制府駱文忠公聞於朝加直隸州銜先生內剛外和授生徒行藝竝進遠近翕然師之自奉儉而予人厚出言惟恐傷人至事關國計民生則較然不苟在官憤獄少平反陳海防不聽遂遄歸嘗患足海夷請療之先生曰吾寧以足死董團時飲襄辦四人拜之曰殉國事平優游數年八十有一無疾卒時爲光緒元年乙亥八月二十日葬於青城山下之先兆子五孫曾多人皆世其業

黃雲鵠曰不齊治單父不下堂而治固得好賢之力向非魯多賢亦安能致然此宣聖所由歎息也雲鵠昔守成都所接賢達士大夫多矣獨以未見先生爲恨越十餘年始爲編次生平以爲之傳嗚呼亦何益哉亦何益哉

灌志文徵

卷二 傳狀

五

潘文瀾先生傳

黃雲鵠

先生名懷珠字光亭灌縣人學者稱文瀾先生邑宿儒宋靈巖高第弟子也宋先生學行冠一時遠近爭師之先生事宋先生誠且久宋先生待先生厚一如文中子之於董常也宋先生易簀時呼先生至授學指乃瞑先生奉其主終身春秋必親掃墓言及輒涕下故其生平行事與宋先生絕類雲鵠前爲文紀宋先生今閱先生事實略同不能不爲文紀之先生事親篤孝待疾不解帶者經年居二親及繼母喪並縗經廬墓三年凡所以慰親心承親志者一如宋先生愛其弟懷玉甚垂老相向泣曰吾二人願同來同去後果一月相繼卒生平見義勇爲誨人不倦一如宋先生其教人先勵以忠孝大節次乃及日課故門徒之盛亞宋先生自倡修邑文廟外他公事皆不與抱道自重視榮利泊如也有竊耕牛者鄰媪子也慮失媪養宥之卒改行居常爲

族鄰解紛難恤無告意豁如也晚歲勤學不衰常引禮父母沒思爲不善恐遺父母羞辱數言自惕前臬使牛雲樵先生歎爲真名儒不誣也所著有大中析解文法正宗諸書藏其家其長孫泉宗光緒乙亥舉人

黃雲鵠曰蜀自兩漢以還儒者以孝友篤行著稱見於漢書及華陽國志者纍纍潘先生與其師宋先生學行皆近兩漢人可謂真善學古人矣若乃不師古人實行大節但襲文字相誇誕曰吾不屑爲漢以後人然乎豈其然乎

錢烈婦傳

陳炳魁

馬氏把總錢國榮妻也年十九歸國榮越六載國榮亡遺一子僅五齡翁年則七十矣性嗜雞子羹每餐必奉之不以貧故缺也一日貓竊舐嫌不潔冒雨市諸鄰歸而易之以進其孝敬如此藍寇竄灌境烈婦以翁步甚艱欲舁遁再三請翁輒曰區區陋室僻處河濱賊豈必至乎卽至亦無害及老人者

灌志文徵

卷二 傳狀

六

烈婦知翁不肯行屬族弟負子走而自奉翁於家俄而賊渡老人橋焚廬火四起則嗚咽跪告翁曰賊至矣媳決不溷迫脅中求活也所恨者不能終翁之養又復累翁以孫難瞑目耳因叩頭起赴宅後大河死翁踰跟救弗及望河而泣賊適至詰其故嘖嘖歎節烈婦翁因得免咸豐十年九月廿一日年三十有一

任三元孫玉藻萬景春父子合傳

陳炳魁

武舉任三元字起山灌縣筏村人狀貌魁梧有膽略藍逆竄崇慶州懷遠鎮三元裒團數千人馳界南街子塲張幟於樹扼味江河而禦之部署未定賊至西岸山矣黑夜火四起叫噪震山谷三元令衆靜以待而自當索橋下枕石臥賊偵之卻退十餘里黎明五道並進截賊上竄轉戰三日道路皆漿食以迎殺賊數百人擒生七十三人一賊目泗水走三元提其髮而縛之賊勢

大蹙遂折竄元通塲越二日衆團約共圖之蟻聚者萬人三元抵柳街塲日將中矣見煙焰蔽天告於衆曰賊焚掠多矣縱之弗擊其若崇灌父老何奮然率隊出從之者有萬景春孫玉藻景春字曉初貌溫雅能文不售援例入太學三元爲團總舉爲團長凡丁餉悉佐理之子世亨善舞大刀與三元姪文藻並以武勇聞於團玉藻字子旒短小精悍背微僂人呼孫公子弱冠冠童軍補邑弟子員而性好談兵父垂綸年七十亦筏之團總也練丁於家每中夜玉藻輒呼起相與舞刀劍錚錚有聲久之乃寢及衆約戰玉藻遂代父行甫入市門值三元出謂景春曰慷慨殺賊真奇男子也吾兩人不可後之遂合隊三四百人直逼大通橋賊從火林望之見三元團幟驚曰味江河鄉兵也皆遁走俄而賊謀知孤軍無援鼓角齊鳴四出而合攻之隊遂潰於鴛鴦竹圍之數重三元麾戈而前文藻及馬喜繼之衝突半里許擊殺數十賊

灌志文徵

卷二 傳狀

七

均被重創力竭死世享負景春走左手反抱右手格鬪賊當其前輒刀劈之一賊伺後力刺矛貫父子背腹仆地死玉藻拔劍突圍不得出賊欲生致之大呼曰速殺我吾不汝屈也遂遇害團首楊正涵及丁勇數十人亦死之時咸豐十年六月二十有七日也

徐守先嚴思賢合傳

陳炳魁

徐守先者少居崇慶州壯遷灌之南界與嚴思賢同里均以義俠聞咸豐十年春衆推爲團長練丁布金寺或詆將不法蜚語聞於縣委員高公詣而驗之子弟百六十人擊刺進退皆有法徧賞之且獎二人爲能感泣曰守先等爲殺賊計也今公諒及此心誓以死報夏六月二十五日藍逆西竄元通塲崇人乞禦之守先執長矛思賢持大刀率丁直馳大石橋以扼賊衝自辰至午轟殺數百賊三戰而三卻之無何賊渡白江河從後襲擊衆團潰守先腹

背受敵身中數十創力戰橋東而死丁之從死者五十有三焉思賢偉軀幹被賊圍執之賊首親爲釋縛以酒食說其降思賢厲罵曰吾與徐守先恨不盡殺汝輩豈從汝鼠輩作賊耶推案起羹酒淋漓覆賊衣賊大怒鉤其尻而倒懸之思賢罵不絕口支解死

贊曰守先與思賢特里巷細民耳乃一遭讒間高公從而激勵之遂奮然殺賊以死雖古烈士何多讓焉且吾聞崇父老曰藍逆之竄元通塲也男女數萬人倉皇未及出走微二人扼賊之衝幾何不被賊虜哉宜里人招魂而葬之春秋猶爲祭掃云

彭公傳

陳炳魁

公諱曙昌字曉山灌南陳村人候選巡檢正明公子也性孝友有志量生一歲而孤曾太宜人撫之成立備極艱危祖國材善醫有隱德置田千餘畝家

灌志文徵

卷二 傳狀

八

素封也及析產有累債悉任償之且讓田數十畝勿較女兒四次適梁家貧恐貽太宜人憂以田與耕勿課租有不足輒出粟鏹助族中覬覦公業構訟十餘年事平仍敦睦之猜嫌胥化公於好施濟賑飢寒給衣食助嫁娶賻喪葬捐義地焚借券然諾聞遠近奔人之急扶人之危輕出財力如與水火絀累數千金產幾落公晏如也每令節拜謁盈門悉盛饌款之尤敬重讀書人情文倍至暢飲劇談連朝累夕猶挽留不肯去賢達之名士林競稱焉咸豐十年滇逆犯川西公倡捐金籌團練治戰具先事預防賊竄元通塲鄆江宣家渡衝要地也大府檄李次星程小崧兩明府率勇數千人扼之沿河居民一草一木走避弗與公多方勸諭俾曉大義治供應之相拒月餘賊遁河東得免蹂躪公有力焉初公七齡就學英敏非常鄉先生咸器重之以家事中輟然歷代史鑑一目了然每論古君國事輒義形於色區區身家計非志也

嗣君洵未弱冠爲諸生旋食餼科歲試輒冠軍書法文名噪蜀中應徵辟者一登薦剡者三皆公教也光緒丁丑春公年七十有三矣諭之曰讀書當求有用汝能早出爲朝廷辦幾件事吾志遂矣勿以家爲念及九月需次秦中聞其奉檄辦賑復馳書誠曰顆粒皆君恩也盡心任事俾災黎得實惠無負憲委勝於承歡矣無一語及家事公狀貌英偉而氣度從容人無尊卑貴賤咸謙和接之溫溫煦煦未嘗疾言遽色生平好排解三黨四鄰白以事即寢食不忘必了息乃已而處事耐煩措詞委婉雖豪暴恣睢之徒莫不心折而去數十年來和人骨肉釋人仇怨平人爭訟者不可殫述戊寅三月辛未里中聞公捐館咸太息曰和事老人去矣瓣香而弔者不絕於門享年七十有四邑太學生以子官誥封奉政大夫

論曰曉山彭太翁者愚少時聞其周困乏濟患難有古俠士風及壯與其子洵交登堂拜謁乃知公之爲人孝友睦婣任卹周官所謂六行者悉兼之矣義俠云乎哉

灌志文徵

卷二 傳狀

九

高太夫子傳

陳炳魁

太夫子慶堂公姓高氏諱萬春字雲楨邑南青城甲人也狀貌魁梧十三四宛如成人讀書能知大義工書法年十六以邑差徭重恐累父兄遂習弓馬入武庠乾隆癸卯科公箭不滿額鬱鬱適較場見牌示技勇過人者許自呈即報名請試監臨李公偉公貌召至前試以弓弓挽二石試以書書參八法李公喜動顏色謂提調林公曰此門生付汝好培之公獲舉會試不第母戒毋遠遊遂養志家居焉嘉慶元年勦辦川東教匪檄邑運軍米當是時賊甚熾道多伏莽邑候丁公延集衆紳糧無敢應者公慨然任之自灌至渠奔馳千里外運納糧臺取批還越一日而糧臺移還見丁公甚獎其能且歎有福

軍需局控訟不休邑侯邵公屬公經理之公請裁妄費杜浮派勒章程於石
訟遂息大府檄置濟田邑侯李公亦以委公公勸捐兩河各購田百畝賑饑
始有備公性嚴正雅不樂履公庭然有大軍役邑侯慕公名輒延公公或不
至必再三敦請之邵公李公號邑賢宰尤重公品邵公嘗語同城曰吾於灌
得兩正人河東善堂劉君河西慶堂高君耳初邑差徭每歲三四派閭里往
往破家自邵公允鑄定式上無誤公下無腴民公之力也公居鄉好施濟乾
隆甲寅歲歉公曰米貴如是貧人奚活乃減價糶之制府孫公額其門曰睦
里風醇嘉慶戊辰青城山大雨水沸沙騰淤壅新堰水道旋開旋塞父老苦
之公曰長生宮後不更穿渠浮沙安消乃請於縣設立長同當舖釀金疏鑿之
灌溉便利至今鄰某欲離婚公曰人倫始夫婦破離不祥乃力全之婚卒無
悔里有是非質公公直折之婉導之豪徒悍卒莫不心服而去公嘗教習騎

灌志文徵

卷二 傳狀

十

射日召及門而訓之曰汝曹立身持家如捧玉然一失手便粉碎矣須兢兢
保護之公長君綬試列前茅有密謂三十金可獲案首者公曰得失有命倘
資緣進身人可欺天不可欺也力卻之以故從公遊者數百人上則無愧科
舉次亦克守身家云公生平酷好讀書凡經史及先生正格言靡不朝夕披
覽之嘗曰吾之投筆肄武者以邑差徭重恐累父兄也年五六十每往市肆
赴燕會猶循從兄出入友愛勿衰焉鄉黨見之皆嘖嘖稱爲孝子悌弟
炳魁曰太夫子至性人也其上信官長下孚閭里歷歷有所建樹蓋皆本孝
友以推之惜養志家居未獲竟其用耳然吾城南師爲公季子得成進士而
孫曾人文濟濟又後先接踵則公之積善餘慶者不誠厚且長哉

秀川公傳

楊起鳳

秀川公諱喬涓姓楊氏予叔祖也爲人孝友恭謹沈毅寡言積學能文從遊

者多騰達年四十舉於鄉屢試春官不售旋掌岷江書院劉善堂蒲聯芳兩
孝廉皆出其門下嘉慶辛酉大挑授洪雅縣教諭在任十八年同寅敬之多
士宗之及解組歸猶依戀不舍有泣下者時年八十矣聰明矍鑠兼通方技
術數於農桑尤多經驗非徒尙空談者也素罕作詩而語特超雋書法穩稱
如其人無一懈筆讀書不倦尤嫻於禮故舉止安詳動中規矩焉公少孤事
兄最謹兄歿視姪如子予伯父翼舟公五父翁齊公事必稟命皆恪遵其教
常以家訓千言爲兒輩課謂讀此賢於習文詞在洪雅時每歲必爲吾祖母
製衣一襲其視嫂如兄又若此起鳳初次北上餽贖甚厚二次更派家丁偕
行受賜實多而未酬於萬一豈他人祖孫可比哉公豐頤方額美鬚髯視聽
不衰與馬孺人相敬如賓孺人嚴正善持家晚年禮佛其尤可法者遇先祖
考妣誕辰豐潔拜獻恆久如一吾子孫能以爲法則事死如生孝思油然而矣

灌志文徵

卷二 傳狀

十一

其長子蔭齋公魁梧奇偉習弓馬輒冠軍受業者衆弟懽亦豁達數爲人解
紛鄉里皆倚重之人謂秀川公有子云

朱純陽傳

李芳

朱純陽灌縣河西人前署獠澤關汎諱炳之來孫諸生衣華之玄孫也素有
大志廁身行伍間乾隆五十二年台灣不靖奉調隨征隸福安康營以功拔
補外委次年正月天山醜類蔓延官軍討之四面攻撲純陽攀藤而上親冒
矢石陣亡事平以把總例贈卹齋志以歿論者惜之

張晴嵐先生傳

李芳

晴嵐先生姓張氏諱國光邑西二江橋人有薄田足自給而篤志好學未弱
冠補弟子員鄉黨景其行及門日衆文風因而一變年逾五十始貢明經非
其志也先生爲人節儉進退有常與人無忤其教授生徒以德行爲本文藝

爲末高弟如王昌麟郭仲逢董玉書諸人皆一時知名士嗣主臨江書院朔望必率諸生詣講堂行禮爲講近思錄及白鹿洞遺規遠近稱盛德多來就學焉先生事親孝致祭恆有餘哀子二長龍圖邑諸生次龍照性誠慤皆毋負先生教有弟而庸不能自立先生養之終身年近八旬重遊泮水土林榮之又數年卒

何左泉先生傳

李芳

左泉何先生諱汝源邑孝廉也幼孤慧絕言談聲響四座皆驚善屬文汨汨滔滔人莫測其涯涘庚戌大挑一等籤發東河知縣以母老解組歸主岷江書院督課甚嚴藍逆擾川先生慨然曰不有團練何以禦防果能剷除賊黨卽是報效朝廷奚必勞形案牘哉未幾賊至先生日夜戒嚴率鄉勇抗之始堵於大石橋繼禦於土什寺賊勢盛衆驚怯而先生獨自奮立刺二賊血濺

灌志文徵

卷二 傳狀

十二

衣裳經一日夜未飲食竟爲賊所害賊亦旋遁邑人哀而壯之

梁階平先生傳

李芳

梁階平先生諱宣秦灌縣廩生性敏而好學其教人以忠孝爲先處骨肉尤退讓雖貧困晏如也邑中試院廢場先生毅然自任與邑令馮公議建築越數月而功竣嘗爲鄉保正至親密友違禮亦必爲所斥以故有恚而嫉者先生不以直道難行而阻也時監李連封團和馬蟻諸賊蹂躪蜀西先生率團堵禦先後拒於元通場楊武渡懷遠鎮憂勞至廢寢食蓋不暇爲家計矣及賊過河始欲奉母引避母老不肯行令先生速去先生曰吾母守節教兒成名今爲賊逼而棄母何忍哉與其去而生不如守而死也母子徬徨泣倏賊至入室先生曰吾母年邁爾勿駭之寒士有何財物賊凶暴先生亦詈罵竟爲所害當時有疑爲兵所刺者蓋由平日躑直累遭人怨故耳後鄉老述其

詳始歎先生之孝雖顛沛流離猶不改節如此以視他人之棄父母而遠遁者何如哉

牟節婦程氏傳

李芳

天地浩然之氣大莫能外亦剛莫能撓未有秉正氣而不能厲堅貞之操者惟得之婦人女子則尤奇石羊場牟吳氏夫歿遺街房兩間二子相繼夭僅一媳程氏爲債涉訟折算街房以抵程氏匍匐公堂泣訴艱苦狀邑宰廉得實乃原之程以織紡助菽水日夜勞瘁無怨怠適藍逆過境衆皆奔竄程氏勸其姑曰賊將至盍偕避姑曰余老何惜一死且力衰不能行汝去可也程氏乃悲號不願往既而賊益逼乃携襆被扶竹杖甫出場人畜雜沓行至黑石河玉壘橋擁擠喧闐賊奔至衆皆亂賊有劫程者姑哭護賊逼以刃程忿投河姑亦入水皆死焉贊曰予讀離騷悲屈原今牟姑婦之死視昔賢何如

灌志文徵

卷二 傳狀

十三

則又不弔忠臣而弔節婦矣

張秉愚先生傳

李芳

先生姓張氏諱鳳翀字秉愚歲貢生律身謹嚴恂恂鄉黨間人仰之者僉曰此吾輩坊表也母氏守節有弟石菴愛而教之膺己酉選拔卒於京師先生遭家不幸遂無進取志主臨江書院有來問字者必與之談忠孝以故及門多端士藍逆竄擾河西衆奔避先生亦匿香積寺中踰時有三賊至先生大呼曰且住賊曰若何言先生曰吾知汝等非賊寺中有酒可供飲此間路僻且偕歸與家人團聚豈不快哉二賊嗤曰此老生迂談也飄然去未幾有數賊進貌凶惡索財先生曰我寒士有何財仍以前言婉導之一賊執刃而前曰彼團首意在稽延時刻不如殺之先生乃罵曰我便是團首汝何爲賊怒甚竟爲所傷而斃子懋修越二年遊泮人以爲天之報施善人不爽也今過

寺者猶追思其言不置云

楊貞孝女事略

郭維藩

貞孝女楊氏者崇義鄉人監生清遠女也幼字同里陳氏甫十二其舅沒明年夫復殤女聞訃矢志往守父母以其幼力阻之女泣曰兒外雖逝兒姑幸存使兒勿往是孤兒姑之心以絕舅嗣也奈宗祀何父母欲與辯而無詞然終猶豫不能決女不言不食誓以死知不可奪姑聽之因凶服適陳方其夫之殤也陳惟此子姑以絕望慘怛幾不欲生女至乃慰相與安焉女謀撫叔氏子爲姑後俟所撫者有出己則更撫之白其意於族人皆曰諾適姒有身女陰備襁褓以俟既誕則男也且屬應繼甫三日携以歸命名道孔鞠畜顧復莫不身任其勞時鄉先達某偉其事字之曰全三義取全父全母且全嫂也全三稍長或倦於讀女無稍假借嘗膝立諸庭不謂之起不敢起然是時

灌志文徵

卷二 傳狀

十四

女年二十七固猶未笄姑白楊公爲卜吉成婦禮是日女華妝盛服廟見後住拜夫墓撫膺大痛兩族親友來會者數百人皆爲泣下姑見其過哀因復自傷旋病且篤女倉惶失措計無所出致齋三日割左臂作羹以進疾立瘳已丑十月二日事也當割臂時滌於井中夜靜無星月光忽井內通明如白晝清澈見底仰視天地作金碧色村中竹樹皆可數適爨下嫗以久不聞女聲出視甫及門則遙見雙燭導以歸云後十年姑沒女躡躑盡哀喪葬如禮全三既成立爲娶胡氏首舉一子女復嗣以爲己子名曰開祚而兩世已絕之嗣乃俱延先是女適陳氏事姑撫叔宗祧不絕如縷流離轉徙其苦有難言者今開祚已十三歲漸露頭角女教之如撫全三時而全三又復生子女數人食指日繁矣

陳子仁先生傳

高升之

青城之鄉有儒而隱於醫醫而陰行其仁者曰子仁陳先生生而恬淡純素循循然規行矩步潛光內照弗耀於外惟時以胞民與物扶危拯患爲急幼習帖括已窺閫奧顧以其所濟狹功不及衆乃遁迹予岐黃深處擷其所蓄精華出以救人有奇術能窮搜二豎子之穴攻而出之捉而烹之人驚爲神性遠榮利於人無忤熱客遇之氣爲之靜人有以疾叩者無富貴貧賤皆殫厥心視人病如身病既奏效輒置不居功亦不希報惟以消盪起痼爲快見善則樂爲遇名人賢士媿媿傾蓋窮究天人不厭凡厥智能皆歸於醫凡厥醫道皆歸於仁此所以與他醫不同也今年春內子偶染恙延醫診視弗效後得先生施治解縛釋負如鼓應桴予奇之叩其所以先生曰吁子欲暢聞醫旨耶吾且爲若言之今夫天運於上地奠於下其互萬古而不息者陽爲之維也上古之時純陽用事凡厥生人得六陽之氣爲多故其時人心篤厚

灌志文徵

卷二 傳狀

十五

風俗敦龐卽有疾疹亦無難名之症詭僻之方陽氣盛也降至後世六陰當令沈痼迭生天札間作奸僞邪慝疾隨心生疾無定形亦無定名醫不知情捉影捕風輒泥古方用之不合眩惑膠滯望洋增歎揆厥所由皆因無陽卽薑桂朮附似亦有異於古降至千禩力應愈微不知所底有由然矣且夫陽也者在心爲仁爲善爲君義爲臣忠爲父慈爲子孝凡宇宙正大昌明之氣皆陽爲之也而屬乎陰者戾是孔子言民有三疾此疾乃心疾自與醫家所習不同而人身之疾未嘗不推此而見醫也者所以抑陰而扶其陽者也言未既有難者曰信如子說不將偏於以火治疾乎先生曰否所謂陽者非後天陰火之謂乃先天元陽之謂也元陽不熱不燥不寒不烈乃生人之元氣也子乃泥於火以求之不亦值乎予聞而歎曰大哉子之言醫也第言疾而千古人心世道俱括其中宜子之居仁行仁宅心仁擇術仁卽名號亦以仁

自策也生驪然笑曰有是哉余因括其厓略而贈以此篇

彭節母事略

王昌麟

節母彭安人鄭氏溫江優廩生鄭籍酉山之次女陝西候補知縣灌縣彭洵古香公之冢媳九思之德配也幼敏悟束髮時酉山公手錄女四書授之不數月卽背誦不忘間課以經傳於訓詁之學頗有會通旋遭母喪哭泣盡哀酉山公又以貢場應名誤點憂憤成疾安人侍疾焚香禱天願減壽以益父算未幾疾轉劇囑安人曰但願異日善事翁姑毋貽汝亡母羞則幸甚言訖遂卒安人哀毀逾常年十七歸九思未及一年九思以癆瘵卒安人欲以身殉者屢矣家人環伺得免旣而念翁姑無人侍奉祖父母又年邁在堂不能不勉承顏以博歡心翁需次到陝權蒲城篆時迎安人至署旋隨宦商南諸縣十餘年始奉翁姑歸謂非節孝兩全乎自後涉獵史傳嘗語人曰觀書所

灌志文徵

卷二 傳狀

十六

以明歷代興亡亦卽所以養自己心志也無嗣以夫弟錫光長子世珩承祧光緒中葉鄰里上其事咨請旌表誥授七品安人民國初年成都開辦蜀秀女校交薦安人主講席時年已七十以老疾辭昌麟少與其夫弟錫光錫疇交結文社時相過從故習聞安人之事嗣以弱女妻其姪熙咸今養疴回里女歸寧其道安人事尤詳竊以爲安人溫良之性堅卓之行宜不可沒是以不揣淺陋謹撮其一二事略以貽大雅俾發揚之非僅彭氏之光亦所以敦風化也

諸兄述略

羅世勳

我羅氏自南部遷灌閱七世矣先府君有子四人伯曰祥仲曰彬叔曰昭季則勳也二百年來率肆農桑先府君始專習儒術然猶不廢耕以命我兄弟蓋高曾之矩矱未敢隕越也先府君在籍時授徒常數十人多騰達者伯兄

叔兄能爲童子師仲兄或趨時逐什一利然非恆業耕有餘力偶及此耳清咸豐八年先府君赴任宕渠家人居署者半伯兄仲兄留耕先隴恆以事往來渠灌間歷十餘年薄有蓄積先府君歸田旋棄養越三年爲光緒戊寅以家中食指繁議析居伯兄徙單壩子仲兄徙陳家碾側皆新第叔兄則舊居勳寓別院未幾徙崇義鄉距故宅八里而近餘距故宅里許也當是時海宇亂息閭閻不驚樂歲綏豐民德歸厚歲時伏臘相與過從舉室熙熙懽然無間諸姪讀書補弟子員者數人克世家學邑人恆稱道焉光緒之末諸兄相繼逝猶子不祿間有喪者而國是復募膠庠改轍吾家耕業稍替學者益寡俯仰今昔不能無慨矣

傅秉忠傳

李永昌

傅秉忠灌之白沙人也幼好習兵術長亦不改清末川盜寢盛同知朱錫瑩

灌志文徵

卷二 傳狀

十七

奉大府令捕賊忠仗劍從之常以軍功冠一營太和鎮之役賊以數百人橫擊官軍勢銳甚適衆疲乏爭走山林以匿忠獨盛氣曰大丈夫生當立功名以顯祖考奈何畏首畏尾如鼠耶乃率部下數十人鏖戰賊大潰忠分兵爲二隊絕其歸路賊死者不可勝算斬首歸報朱公朱大喜列狀薦大府忠得把總職銜及賊平仍閒居乃長歎曰自吾從朱公討賊今數歲矣大小數十戰身數十創不過作一把總豈非天哉豈非天哉於是慕王承福之爲人棄其職而學焉忠性慧所塑像莫不肖其人灌人戲之曰君前殺人而今塑人其將以此塞造物之報耶忠笑而不答有子正元亦大有父風

論曰昔人有言大勇若怯大巧若拙吾於傅秉忠見之秉忠之爲人其容貌言語非有異於常人也一旦任職視死如歸雖古之名將何以加焉及鬱鬱不得志遂以圉技自晦儻所謂進思盡忠退思補過者哉嗚呼古之英雄其

不得志而老死牖下者多矣獨忠也歟

長女樹芬行略

曾學傳

樹芬字馨畹吾弱息六人男女各三男以仲子寶和爲才女則樹芬長而賢動不踰禮辭氣容止婉順而莊肅雅慕古賢媛行事而尤善班氏女誠字灌縣師竹筠之次子表表志學勵行探聖賢精理微言而心契之爲吾高弟未婚而表病卒樹芬聞耗痛不欲生吾再三諭止乃泣跪請過師氏守貞必吾應而後起吾哀其志允之表父母皆喜吾率家人送之如灌樹芬悲悼欲絕者數表柩停竹林寺往奠灌人男女往觀者如雲充塞祠宇幾不能成禮吾惴惴左右之卒事返師宅幸得不死樹芬自是矢志孝養翁姑俟表昆季有出乃爲立後逾年姑病瀕危樹芬剖臂肉和藥以進姑病愈未幾因家事愠鬱病發遂不起師氏於是內政失主樹芬益感傷每深更獨夜寒鐙悽然惟

灌志文徵

卷二 傳狀

十八

自遣悲懷思盡已道日間雖負病亦勉強支持行同僕役如是者三年所志不一遂嗚呼苦矣今年夏翁遭難被羈月餘未解樹芬歸告其事乞爲之地辭甚哀切予急作書與相識營救樹芬回灌三日吾方冀其事稍解孰意凶耗飛來吾女竟投江死矣時在夏正甲子五月二十一日也家人往哭其喪歸言其死狀附身衣物皆緊束密縫懷中絕命詞有一死全貞之語嗚呼痛哉猶憶樹芬歸寧道其家狀輒言翁歿必死惟死乃可以全其身今何爲先其翁死哉樹芬平日所以忍死者爲乃父乃翁在今皆忍棄之誠何故耶天地鬼神森然四照豈無知之者哉豈無知之者哉嗚呼表吾之高弟樹芬吾之賢女其死也相隔纔四年今日相遇吾知其必得樂土而居之以鳴琴瑟之歡於浮埃之外吾又何悲也哉

何君宗武傳

祝介

君姓何氏諱朝品號金三宗武其字也世居灌東金馬鄉舊族中衰安於處約賦性敦厚質有其文讀書不第援例入監恂恂鄉黨稱善士焉母劉太孺人待君嚴而篤愛其弟朝錦事無鉅細悉委之君恐傷親意則曲從太孺人有拂意事怒施夏楚輒含笑婉言以受每爲霽顏君祖志道公與鄉人釀金創文昌會於土什寺歷有年矣君董會務始興鄉課旋改義學培植林園蔚然森秀樹人樹木慮亦遠哉遭家不造乃厄於火負債滋訟舉室播遷君乃挺身赴質有司廉明訟得解餘資付弟而代養其子女家徒四壁丁口七人惟恃硯田以活辛苦備嘗顧怡然自得夜朗誦詩聲出金石嘗指其子學典曰此吾家百畝水田何憂貧太孺人聞之爲輒然笑也學典既畢業成都府中學校艱苦卓絕君乃稍慰無何太孺人疾衣不解帶凡閱數旬順時告終喪葬一衷於禮時戚族有爲訟累者君盡力扶助勞怨不辭蓋推錫類之義

灌志文徵

卷二 傳狀

十九

所以廣孝也已而移居成都學典投筆從戎寢以騰達學章述事亦有緒業而君優游頤養以終歸正首邱極榮哀焉君生於憂患中而能毋怨毋尤晚以貧故捉刀筆仍爲人解紛固未嘗因以爲利每訓其子曰吾事親何敢言孝惟順受耳汝其識之原配王繼配黃亦皆賢孝能成君志今其子益恢厥家光復先隴方興未艾繼繼繩繩鄉人慕之以爲積善餘慶可以風世而勵俗云

贈序

灌縣崇義鄉九老會序

高升之

天地間祥和醇茂之氣深儲而厚植者以時發而著於外則必爲聖瑞爲休徵爲媪伏爲孕育爲萬彙之昭蘇爲四方之交泰其于玄緯也則爲重輪爲重光爲景星慶雲之符契爲山車銀鸞之珍奇其于世運也則爲龍德之正

中爲明良之際會醞釀未已而麟遊鳳舞甘露醴泉之屬乃起而應之而草
茅之下乃亦有敦龐醇厚古貌古心者以合而成協氣昌時之瑞鄉邑間應
有其人然未有如灌邑九老之爲尤著者也載稽往籍凡所爲羽化冲舉之
說率皆虛誕其信而有徵者若書所言民獻之十夫禮所述臨雍之三老傳
所稱康衢之叟絳縣之夫下逮漢晉唐宋以壽尊者更僕難數然歷代皆侈
爲美談則貴老之義尙矣竊嘗論之域中之最尊者帝王有奔走羣動之力
有宰制萬物之能顧於壽獨無權而堪巖幽谷之鄉廣漠窮荒之野乃亦有
鵠居鰲飲不記甲子罔識春秋者然其人率渾渾焉悶悶焉並不知詩書禮
義爲何事生則與麋鹿爲羣歿亦與草木同腐由斯以談則大椿之與朝菌
亦何所挾以相徵乎則夫所謂老者固非第老之以其年而實老之以其德
也不見範言五福世緣甚鮮而心性居多孟述三尊爵惟列一而齒德竟倍

灌志文徵

卷二 贈序

二十一

原古人之意豈非欲聞其年則松柏親其範則芝蘭始爲名稱其實歟然此
意非深明乎古王者鄉飲之心與憲老乞言之義則不能行即行矣而不曲
盡其善惟晁曜南大令于蒞任伊始卽思表揚耆德以風勵末俗于灌陽物
色其人自陳錦楊綰以下得九人焉是數人者皆近協鄉評遠孚輿論洵所
謂一鄉之善士公亟達諸大府因而得以上聞朝廷皆各錫品秩有差人聞
而榮之愚惟優老盛典也崇德美政也晉秩殊恩也惟公于引年尙齒之中
寓尊德興賢之義將使鄉之人式而矜之曰某與某人爵雖未優而天爵乃
交懋于以維持風化上副朝廷維新之治不難矣愚嘉晁公能得政體與九
人相與有成也因序其由而弁諸簡

送眉州學正陳居輔廷序

彭洵

蜀中多佳山水惟巫峽劍門峨眉雪山稱最而峨眉尤秀甲天下巖壑幽深

峯巒蒼翠與邛嶻熊耳諸山相映帶岷江玻璃平羌諸水左右環之地愈僻
山愈奇而人亦愈不易到眉之爲州距山數十里背青郊面大江山靈清淑
之氣磅礴鬱積久焉而鍾爲偉人漢之張綱宋之三蘇與陳季常唐子西輩
於是乎生宦是邦者爲魏鶴山吳昌裔輩靡不喜其多材爲簡拔俊秀裁成
後進俾士習民風煥然改觀傳爲一時盛事迄今懷古猶豔羨不衰吾友陳
君輔廷以廣文選官於眉買舟將行門人故舊酌酒祖道臨歧戀戀恆不忍
別予乃起而言曰國家因明舊制海內郡邑胥立學學必有官以之司教化
廣甄陶譽髦斯士意周且詳一時理學名臣胥由是出人才之消長實隱係
之故官雖微而任綦重厥後師儒以官爲家委委瑣瑣與諸生較錙銖不聞
其造就若何朝廷設官之意漸滅殆盡而人由是輕之良可慨也君博學多
識憂樂同人能肩任大事爲一時名孝廉茲行必能滌除積習嘉惠士林日
道上一聽好音而已故於其別書以識之

王孚廷先生壽序

周盛典

咸豐四年歲在著雍攝提格元月吉日爲孚廷老伯八秩正壽其門人傅孝
廉毓秀典世交也乞爲文以祝典自慚謏陋文不足以行遠何足爲公壽第
念公與家君總角交最莫逆今家君年七十有五公年八十兩老人白髮皤
然昕夕過從其出也步履健捷不假輿杖見者不知其爲古稀外人也其得
天之厚豈偶然哉傅君侍函丈垂四十餘年備承造就更爲余道其家世之

詳典曰噫此公富貴壽考之所由來也公先代家秦之三原國朝定鼎後始入川居灌傳至太翁珍羽公生而穎異精青囊術家傳忠厚有隱德德配饒太宜人生公弟兄二人公居長太宜人早卒弟兄皆數齡珍羽公親操家政以嚴父代慈母教養備極辛苦一室蕭然澹泊明志繩牀獨處者三十餘年鄉人傳其清風高節比之公家右丞摩詰以爲美談平生行誼備在成都志乘中嘉慶庚辰公年未及冠補博士弟子員旋以優等食餼終日下帷攻苦冀博一第以慰親心屢膺鸚薦不遇遂養晦家居授徒日以養親爲樂先意承志一日未嘗離左右洎珍羽公捐館公哀毀骨立水漿不入口者數日葬祭一切如禮弟又以弱齡病夭公念同氣無人潛然淚下每悲太宜人不及養珍羽公之未竟養也手製風木圖以寫哀思當代鉅公名流題詠甚夥悱惻纏綿如孺子之悲哀感行路其至性有過人者嗣以豫工出力授瀘州鐸

灌志文徵

卷二 贈序

二十一

州固殷富人文薈萃公履任後召諸生設課社集都人士角文藝誘掖獎勵成就人材甚多瀘郡科名之盛至今甲於全川皆公之教化有以致之也生平好結客培植寒畯不遺餘力冷署中坐客常滿酒酣耳熱抵掌論文有陳孟公孔北海之風焉當滇匪李逆之入川也州適處其衝時川南阮觀察與許州牧知公有幹濟才力邀公出教士練團爲攻守計賊至公率士民團練禦于郊外相持旬餘屢戰俘馘無算以計擒獲李妻逆母賊之不得逞志於瀘者公力居多焉事竣大吏上其功詔以知縣候選同知升用恭遇覃恩授五品封祖若父贈如其官嗣君迺斌策仕皖江歷署郡丞政聲卓著孫永旸亦以游泮食廩官廣文少年特達決爲遠道之器蘇子曰不於其身必於其子孫吾將於公卜之公年七旬卽自瀘解組歸優游林下足不輕履公門暇則與鄉鄰樂情話與故舊敘交游小子後生過廬而請業其色溫然其容粹

然年彌高而德彌劭知天之報施善人不爽而公之康強逢吉正未艾也吾邑青城爲洞天之一有老人村以典所見自公而外壽至八十餘者尙有費老夫子英享孝廉孫廣文華琴宋水邨上舍諸人皆以老成碩望推於鄉里昔文潞公爲洛陽耆英會白香山有九老圖其人皆未盡八十居處不必一鄉今公與諸公望衡對宇精神矍鑠望之如神仙中人竊願天之假以期頤家君得以常參末座同作青城老人將有好事者圖作屏風以流傳爲桑梓千秋佳話典實榮幸焉傅君曰善遂授筆而爲之序

武德都尉唐君六十壽序

謝開一

從古高人奇士往往自託於曠達不羈蕭灑出塵之舉以寄其慨如阮嗣宗李謫仙米元章諸君子其明徵也而不知者未能深窺其隱漫以放誕目之此何異飛鴻已翔於寥廓而視者猶孜孜於藪澤耶求之近世實不易覩若

灌志文徵

卷二 贈序

二十三

唐君者殆其人與君名典耀字超舉先世居楚南武岡州之馬渡奕葉相承歷數十傳矣有思明榮貽公始由楚遷蜀卜築於灌北之蒲村卽君大父也存心制行敏健誠篤披荆剔棘沐雨櫛風於艱難中創業所爲其基其蓄者貽謀良厚繼志者君之若考通湖公敬承先業肯構肯堂肯播肯穫擴丕丕基而家聲由是大振繡壤式廓宣畝極於東南棟宇巍峨宏廠甲於西北表表焉爲汶上之冠族君卽其仲嗣也夫以播遷之後甫再傳而揚厲若此使非積累之厚何以流光若是之速且大也先德之隆於茲可考豈不懿哉予以學掾之役洩灌繼主岷江講席久耳芳名未挹芝宇迨道光三年春暮乃得登堂拜謁親覩丰裁當其初涉林藩已不禁心爲之異曰葱葱鬱鬱氣佳哉非凡境也翠屏列後高並雲霄綠水縈前淨涵澄碧虬柯修幹排笏駢螺風花雲葉暖蒸十里煙光蝶板鶯簧緩奏一林仙樂日游者久之及迤邐漸

近則見修篁疏柳中爽愷熒煌陸離隱見載登庭除則幽宵清虛塵囂淨盡捲幕則嵐飛芝閣開軒則綠到松廳靜與心謀虛與神洽有如入卿嬾陟蓬島超曠哉王摩詰之輞川陶靖節之栗里不是過矣豈非徵士之沁心園幽人之安樂窩與相見挹其雅度則飄飄乎羊叔子之風流也聆其警欬則娓娓然王夷甫之清談也儀其周旋進止則又油油然稽叔夜之豁達裴叔則之瀟灑而不拘於繩墨也溫文爾雅倜儻風華固自天成亦由性致殊令人有淳古坦直之快焉夫以先世之創垂若彼而君之守成若此箕裘克紹拓大前模啟後承先俾昌俾熾而優游泉石容與園林笑傲煙霞閒觀綺陌逍遙景物小住坡涯寄興山水之間騁懷獨超於凡俗結契羲皇以上逸趣直偈乎初民此卽所謂曠達不羈瀟灑出塵以寄其慨與古之君子相頡頏者於是乎在而顧以放誕稱之過矣是年孟秋中澣適君覽揆週甲之辰當祝

灌志文徵

卷一 贈序

二十四

者丐序於余余愧不文而重違其意因爲之序至其敦孝友於家庭篤睦婣於閭里和氣洽於鄉黨信義著於交游嘖嘖口碑鄉評久定矣余故不贅因爲之贊曰桐書錫慶禾冊基祥遙遙千秋奕葉流芳粟園高節天隨清風二疏紀重四皓名隆楚南緒衍蕃昌馬渡載遷蜀中家聲丕著蒲陽再傳箕裘絕美巨室煌煌原田每每維君昆仲益恢先業家近青山宅繞喬木水竹平分超塵脫俗達士之室幽人之園可以養性可以通禪式穀於茲克繼克繩螽斯緝緝麟趾振振雲祊千億濟美徵祥閭里之榮邦家之光惟先之貽惟君之積克昌厥後篤謀燕翼初度嘉辰傾酒倒卣聯裁短章恭爲君壽

朱孺人姑婦同壽序

陳炳魁

灌城西北隅有金龜山焉土堅而氣聚形端而色黃青烏家謂其自乾出巽爲鍾毓遐齡之地男固必有耆英女亦必有壽母也乾隆間星銳張太翁適

卜居於下太翁偉軀幹性嚴毅有傑士風原配高太孺人生子三繼配朱太孺人得其助業日起晚年好彈棊終日弗倦壽九十每入市道旁咸嘖嘖曰張太翁真行地仙人蓋謂其佳男佳婦足娛桑榆也而季婦劉宜人尤以賢著宜人劉泰儒季女家甚富性貞靜自幼無金玉紈綺好及笄歸碧泉公事翁姑最孝謹凡饋酏酒醴諸類無不先意承志以博二人歡太孺人屢謂太翁曰吾繼姑何幸得此賢婦也太翁輒首肯之碧泉理家政宜人佐之筭鑰必謹井臼必勤漱澣灑掃必潔且肅卽勞苦艱辛之事悉毅然躬任之不與妯娌較撫猶子輩如己出長者教以讓少者教以恭伯叔昆弟怡怡一室同爨數十載咸多宜人內助之力生平言動不苟每佳節良辰張燈演劇傾城婦女競爲遊觀宜人聞之則甚漠然也外言不入內言不出非屬懿親莫睹其面卽家有冠婚諸宴會太孺人命之欸客亦未嘗輕出戶庭焉宜人一子

灌志文徵

卷二 贈序

二十五

一女而教之如嚴師黃昏輒照青燈憑一白木几左課誦讀右督針黹雪冷霜寒不稍姑息必太孺人諭之曰夜深矣毋過苦孫兒孫女也乃止毅齋承宜人教奮志功名屢試不獲一衿乃作藩庫掾宜人朝夕誡曰錢糧出入半經汝手勿取分外財以貽大母及吾羞也故奉命辦公恂恂然書生面目羣推爲忠厚長者嶽莽茂才同治庚午臘不幸早歿宜人泫然曰是吾之從孫而姑之曾孫也其三子一女衣食或缺何以上尉吾姑心歲助數十金無吝意亦無倦志嶽莽之兄春谷司馬時官長安太孺人馳書諭曰吾聞近世士大夫擁金錢廣田宅同胞弟兄聽其顛連不顧者比比然矣汝叔祖母歲周汝弟婦子女洵巾幗仁人哉具爾職銜其上請貤封焉春谷乃以聞於朝貤封五品宜人今秋八月吉日宜人八旬誕辰也邑之搢紳先生及其里黨姻婭謂宜人孝敬慈惠素有令德旣賞鸞封之詔宜廣燕喜之章相與攜壺挈

榼競爲賀而壽之宜人瞿然謝曰吾姑年九十矣芝蘭繞膝簪笏盈庭不爲姑壽而爲我壽乎於是族鄰合謀次第申祝宜人著命服服繡裳躬率六代兒孫踰濟濟爲太孺人捧觴上壽然後一受躋堂之拜猗歟盛哉望寶婺之聯輝慶金萱之遞茂則由耄耄而期頤其福壽有方興未艾者矣彼世傳龜山金母化氣得以長生豈若茲之兩世慈幃本大德而爲大壽乎愚故謹即所聞者記之遙望玉壘諸峯以代南山之祝

劉氏小清明會序

陳炳魁

墓祭以清明爲會俗禮也亦古禮也蓋自周武王將東祭畢其後曾子曰椎牛祭墓子路曰反國展墓俗之有墓祭因沿於古也漢書載明帝正月上陵五代史記寒食焚紙錢朱子家禮載寒食墓祭儀俗之墓祭以清明亦沿於古也第古祭因宗法而行後世廢大宗小宗之法而俗之紛然將享者遂不

灌志文徵

卷二 贈序

二十六

計德澤之淺深世代之遠近概無隆殺以祭之夫豈古人報本制禮之精義哉然則墓祭以清明爲會誠不可無所區別於其間也愚友劉子曉樓寄書而告曰吾劉氏之遷陽安河西也二十餘世矣洪武二年由楚入蜀越數千里而創業者吾始祖遷二公也順治初年遭賊失譜繼十三世而起家者吾世祖學華公也每歲春秋二祭族衆千餘人妥先靈拜邱壠祠堂而外固有清明會矣今年春念吾曾祖珠文公子姓日益繁衍爰集四房謀之僉以別建一會爲善於是尊舊有之會爲大而名新設之會爲小焉請一言以爲吾族光患三復觀之不禁喟然嘆曰古禮之廢久矣劉子於清明會因始祖而大之其仿古人之立大宗乎因曾祖而小之其仿古人之立小宗乎昔程子援服制以例祭祭及乎高祖溫公定家禮以奉祭祭及乎曾祖西河毛氏亦云詩書每祭止稱曾孫則爲曾祖設會尤禮之酌於古而宜於俗者也且集

其錢穀之助夥然成爲鉅款則量出入權子母豈惟是焚獻拜掃云爾哉蓋後日之增祭田以敬宗置義田以收族即於此會卜之矣愚故謹爲之序

封翁馬君贊臣六十晉一壽序

吳之英

昔洪範列九疇以壽冠五福之首而其先則推本於好德錫福由皇之極故孔子稱舜之大德亦以必得其壽美其究蓋人生以直惟其天全神全而後形全聖賢所以盡性後來立德者尙焉處士馬君順璋字贊臣世居灌邑父某秀桀邁俗游心六藝潛於時尙樂道閒居母郭孺人體性幽妙函氣清淑芝蘭在心芳香自遠君甫免懷抱孺人溘逝响然却顧痛深思曠泣有餘墓孺子之情摯哭无常聲嬰兒之哀至直以和順夙成根於天性不學而化自至若神訖入小學習小道七年閉戶大成可期而是時家步方窮生產未殖幼者尙穉老者遂耄君家嗣宏濟斯艱勤勤心計以爲端木名賢不薄貨殖

灌志文徵

卷二 贈序

二十七

蜀氏素封久偉懷清始學轉遷居積較行賈三五之爲息偕鄭商以入市隨周客以出關逐日中之奇贏權他人之子母園法雖皆筦子之利十二尙非史公之財乃能納兼金之賄受百兩之報植灌木以棲風禽激西江以迎涸鮒外有會計之名內无嗷嗷之詠君之能自拔於寒賤已如此夏丁父憂因哀飾文稱財制禮亦爲漆絮之錮不計柏楸之譌埒身埒棺必誠必信親故來會稱无恨焉繼玩噉嗑之占竝感嚶鳴之和斷金有利子貸猶饒千章居陸魚波居水羊躠牛噉棗橘薑韭之攸宜師計然之成規擴范君之新意蓋旣窺市井行異邑入而猶是處士之義焉豈所謂素封者邪繼母曾孺人賦性嚴亟典責无假君於孺人眠膳問寢寒煖之節疾痛疴癢抑搔之適出入先後扶持之謹委曲先意用得驩心有弟一畫產業而離居一粟一縷皆竭君精魄而經營之於其歿也撫遺孤而育之猶子人之見之者幾忘其爲繼

母出也蓋君雖有廉賈之贏不爲嗇夫之愛故雖歷奇已之極遇而化爲祥覽之竺行人言蓋無間爾其所以處兄弟親戚可知矣常謂人有不做之性則能鍊衿粹之神神不脆矣物故莫得而攫焉无所容其厲爾長繼華次繼榮次繼儒皆秀擢恂恂勤德不實有孫且成列矣繼華舉秀才好學深思爲邑人所推重今年冬君年六十晉一英之來也繼華以狀聞證之同學蓋信英賢君且賢繼華也爰序所聞以爲君壽

何公喜亭壽序

郭仲達

蓋聞爲君爲相爲友不若爲師得位得祿得名還期得壽所以鵝湖鹿洞千秋垂不朽之經槐市杏壇萬古媿莫京之美拈瓣香而禱祝天相吉人樂化雨之涵濡德符壽考豈徒丹猿獻果西王母宴罷瑤池白鶴飛觴南極星輝騰銀漢也哉學師喜亭何老夫子珠江巨族錦水名家咳唾成珠文章似錦

灌志文徵

卷二 贈序

二十八

手披萬卷芸窗之燈火輝煌心細十分斑管之烟雲繚繞著青衿於壯歲頭角崢嶸困白屋於英年羽毛豐滿授徒三載乃弟則舉孝廉制藝百篇名士羣欽模範正宜光爭日月繪軒冕於丹青節著風雷展經綸於蒼赤何乃奏高山流水之曲卒鮮知音裕研京鍊都之才更無同調鵬飛有志王子安未託龍門鸚薦頻邀羅昭諫難登虎榜俄而干戈擾攘戎馬倉皇公乃斬木槌而建旌旂置詩書而披甲冑韜藏虎豹八千子弟奔騰陣步龍蛇十萬丁男踴躍羊叔子輕裘緩帶籌畫偏奇諸葛亮羽扇綸巾指揮任意縱使烽烟滿地將軍有拔幟之能因而劍戟連天父老無守碑之哭厥功偉矣宜享鐘鼎之榮此志淡然願作泮宮之主前度夔門宣木鐸教澤猶彰於今灌口湖淵源士林共仰所異者青氈久坐猶徒篤志青燈白髮將臨更不繁情白鏗聽講則雪深三尺麀尾生寒論文則筆掃千軍鼠鬚絢彩擔囊負笈春風助桃

李芬芳煮酒烹茶夜雨譜絲桐雅韻前生徒而後女樂絳帳高懸分苜蓿而飽鱉蛙紅綾預兆加以慣舒青眼不惜釜鐘長抱赤心無私囊橐實二三子之樂從亦億萬人所共見生等欣瞻芹藻忝列門牆因拔擢而發憤三隅經品題而身價十倍茲者數符天地正鱣堂服政之年星見丙丁值海屋添籌之歲嶺上之梅花開遍承思東閣鴻才瓶中之柏酒釀成共道西山燕喜代毛洗髓分甘液於酈泉方眼龐眉借靈砂於葛井挹青城之爽氣龜鶴遐齡慶黃髮之詩歌笙簧並坐佇看子生九九懸金印而登禮樂之堂兄弟雙雙飲瓊漿而上蓬萊之閣

蕭公顯有八旬晉四暨林孺人七十雙壽序

周正坤

蕭君勁修者灌邑茂材也博學通古今達世變尤善於誘掖後進邑中農業高小暨傳習師範各教育皆資焉丁巳歲正坤客於灌適與勁修同事握手

灌志文徵

卷二 贈序

二十九

如平生歡一旦課餘之暇圍爐煮茗暢談家事始知勁修年已及壯猶有祖父母在爲慶幸者久之既而問其年則曰八十有四矣再叩其壽辰則笑而不答坤喻其意亦不復問退而思之昔人謂七十爲古稀今蕭公年踰古稀已十有餘載矣其倖獲於偶然之數乎抑別有道以致之乎於是遇有與蕭君相知者輒訪乃祖之行誼遲之又久其詳始得而聞焉且夫富貴功名舉世所艷羨而趨鶩如狂者也然自豪傑之士觀之一切皆可以智巧取能力爭獨至於壽予之自天奪之自天雖有智巧能力不能爲功於其間夫天之於人果何所愛憎而必欲予之奪之哉蓋天者理也天生人而畀以民彝之理卽是之謂命卽是之謂性順是者吉逆是者凶天固無心於予奪人自爲其順逆而予之而奪之耳惟茲蕭公雖不事詩書而性情純篤夷考其行有循理而合天者數大端一曰孝公幼失怙其母孟孺人享年八十有一公事

之竭誠敬慎始終如一孺人歿公日省其墓無閒寒暑如是者又數年王哀泣墓不是過此其宜壽者一也二曰弟公有弟名顯壽經商有所獲輒分潤之手足之間怡怡如也後其弟歿公哀傷之情久而未歇以視世之鬩牆競利骨肉而讎仇者賢不肖判若霄壤此其宜壽者二也三曰慈公原配劉孺人生子達福有九齡而孺人棄世續娶林孺人公以刑于之道宏鸞子之恩於是孺人愛達福如己出鞠育顧復至於成立抱孫二長日應銳即勁修也公課孫讀書異常枕摯每逢歲節必親叩師門致其誠敬之意勁修遂以此遊泮至今爲邑人師此其宜壽者三也至於治家嚴毅對人和煦以禮接物以信廣交是公一生和祥之氣充於家庭溢乎閭巷人之所順天固莫得而違純嘏之錫公殆操券獲之非徼倖於偶然之數者所可同日而語也雖然公之行庸行也其德亦常德也人同此心心同此理匹夫匹婦苟能操而存

灌志文徵

卷二 贈序

三十一

之擴而充之夫亦孰不能爲公者乃今執公之德之行以繩天下之士往往求諸千百而不得一二衆人悖理以違天公獨循理以合天則此如岡如陵之福天不予公而誰予哉斯理也知命之士類能言之然若吾友勁修者能知其所以然而不能言其所以然何則以子孫而表揚祖父懼私也惟坤遠方之人無所嫌疑避諱不妨代勁修言之因作是序以爲蕭公壽並以勗此邦人士勉爲孝子悌弟同登仁壽之宇云

帥母朱孺人八旬晉二壽序

蔡培基

夫芝秀瓊圃莫拂璇階榆徹夜而經天松抱冬而拔地是皆祥瑞蔚其英華故五福之徵必先言壽三多之祝惟以永年古來有大德者必享遐齡無疑義矣若我帥母朱孺人者初作新婦卽爲賢媛相夫子以無違主中饋而有德衰扶鳩杖能潔滌瀝承歡冷耐牛衣偏忍饑寒自慰詎意數邁陽九禍變

非常十室九空黃巾徧地一家四散藍寇偏人奔走辛勤流離亥步天涯遊
子舞彩猶虛堂上老人騎箕增慟姑因鵠寡徒感天人婦飭鴻儀益隆典禮
顧菽水方潔於房中而護華忽萎於堂北潑其泣矣謂之何哉差足幸者白
頭雖逝黃口新添且共藁碓唱隨永偕琴瑟靜好無何枕邊鴛夢又成臺上
鸞飛六珈虛偕老之期孤身抱未亡之痛家徒四壁屋僅一椽地無立錫室
如懸磬在孺人自處固已艱苦備嘗而哲嗣裁成則復教養並至如父訓子
以母兼師鐙影搖紅手工織素可謂持門之健婦勵節之女宗也至於待人
以惠稱物平施女布男錢上下得體仁漿義粟周恤弗慳雖萱闈以寒素持
躬猶未致富而梓舍以岐黃糊口亦可療貧然一藝縱足名家千里尤恢壯
志喜談龍韜之略投筆從戎忽戀烏哺之私還鄉祝嘏從此守壺公妙術頤
養高年著萊子斑衣歡娛晚景蓋孺人之能壽皆國祥之善養也歲在屠維

灌志文徵

卷二 贈序

三十一

協洽二月二日孺人八十晉二熙春絢彩愛日舒長緬堅節之貞松凝德輝
於慈竹孫枝亦秀祖幹尤尊筵開益壽之花觴介恆春之酒壽添海屋頌獻
岡陵伏願人請褒揚建坊如例我歌天保崇禮引年

清誥封奉直大夫蕭文彬七秩壽序

李映葵

六一軒鼓柅西行源探灌口五千里大江東下目極吳頭園署寓公當日則
丁年丙歲亭留過客而今已皓首龐眉兄難弟而弟難兄瑞符荆室子有孫
而孫有子慶衍蘭階允宜珠樹長舒歷春秋而不謝金仙難老壽日月而恒
輝者矣恭維封翁大人鄮侯華胄江左名家累世簪纓不讓西州鉅姓一門
競爽久推南國文宗少時鸚鵡之才客已呼爲小友壯歲麒麟之對世共稱
以雄師逸氣橫流蘊奇輝於淵海鷲才絕艷淬新刃於芙蓉而乃瓶乏兩娑
田無二頃榆花滿地未可爲錢槐葉推階詎堪長爨雖處囊而未鈍劍在匣

而光沈不得已利逐蠅頭塵隨馬足赴成都而問卜學猗頓以持籌於是智
晰秋毫居成夏屋烏衣巷古鴻案妝新石麟則天上送來金鑿則屏間喚出
荆枝兩樹槐蔭一庭空北冀之羣講幄咸推前席拔西陵之幟儒林獨冠一
軍行且揮毫闈室校讎玉殿之書待詔柏梁寵錫金蓮之燭豈止二馮同德
名題棠棣之碑兩杜齊輝績著股肱之郡也乎且夫輪囷山木經百折而始
歷千年澎湃江濤過重巖而乃得一束自人情詐僞世俗澆漓安竟忘危愚
而妄用眉宇盡屬金錢耳目罔知書卷斜陽燕子華屋委之他人往日蟬魚
遺經歸於別姓惟公識悟盈奢力防驕泰花晨月夕杖履而遊早韭晚菘傳
餐即具興來不淺清城是娛老之鄉情往而深玉壘爲忘憂之館訂交遊於
金石託意氣於雲霄揮塵支筇蕭然獨得左圖右史莫與爭能雖未逮親祿
養羨軒冕之爲榮果其淑世名修卽布衣而亦雅况復謀貽燕翼瑞叶螽斯

灌志文徵

卷二 贈序

三十一

蘭芽桂茁紛披謝傅之庭薛鳳荀龍競繞汾陽之膝子談爲太尉之孫蟾精
夙慧紀羣侍仲弓之座星聚今霄佇見躡躡金馬之門緩步玉階之石鳳毛
五色文章輝映於錦堂龍誥一箱寵賚榮施於通德因知竹報平安福履之
綏無旣花開靈壽臺萊之祝靡涯矣歲之五月慶值稀齡是日也絳闕雲開
慢亭萼放靚青禽之北至睇元鳥之東來星現少微共進華封之祝波明濯
錦羣稱介壽之觴豈惟二首六身僅書亥字便擬千秋百歲好紀辛年菜等
忝屬通家久欽碩望企綠陽之里第未獲追陪拈鏤管於山莊略形梗概豈
足借重屏幃之色庶幾稍貢筐篚之私緬衣帶之盈盈岷水易爲蕭渡誦雅
詩之藹藹我公原是吉人

灌志文徵附載

勘誤表

卷數頁數行數譌舛

卷一 第一頁 第十三行正文 朽迨二字誤倒

同 第三頁 第七行正文 脫一冀字

同 第五頁 第十五行 桂林二字誤倒

同 第六頁 第十三行正文 劉嗣勳下多一清字

同 第九頁 第二行正文 周盛典誤複

同 第十頁 第二行 圻誤作圻

同 第十一頁 第二行 峴應作現

同 第十二頁 第二行 崇寧誤作崇慶

同 第十三頁 第三行 翔誤作翱

同 第十四頁 第四行 生民二字誤倒

同 第十五頁 第十五行 堰誤作堰

同 議政

灌志文徵附載

勘誤表

同 第五頁 第十三行第二十九字 油誤作由

同 第七頁 第十八行正文 圻字誤圻

同 第九頁 第三行第二十一字 令將二字誤倒

同 第十一頁 第三行 已誤作以

同 第十三頁 第十三行夾注 場誤作場

同 第十八頁 第一行第十七字 圻誤作圻

同 第十九頁 第十一行第十六字 行誤作衍

同 第二十頁 第二十二行第一字 隆誤作陸

同 第二十七頁 第十七行第十七字 壞誤作壤

同 第三十一頁 第十八行夾注 此誤作者

同 第三十二頁 第二行第十二字 人誤作人

同 第三十五頁 第八行第十九字 隰坂誤作涇坡

同 第三十五頁 第七行第二十字 壤誤作壤

同 第三十五頁 第十二行第九字 食誤作貪

同 跋序

同 跋序

同 跋序

同 論著

第三十六頁 第四行第十二字 爲誤作我

第三十八頁 第十四行第十九字 寧誤作世

第三十九頁 第十一行第二十字 鉤誤作鈞

同 第十九行第十四字 藝誤作褒

第四十一頁 第八行第二十一字 以誤作有

第四十三頁 第一行第十五字 偉誤作緯

同 第二十一行第十九字 嘗誤作當

第四十四頁 第五行第五字 頊誤作項

同 第二十行第二十七字 稀誤作依

第四十七頁 第二十行第十八字 令誤作今

第五十頁 第十二行正文 稟誤作藁

第五十一頁 第七行正文 字字衍

同 第七行第十一字 薰誤作董

第五十二頁 第九行第二十六字 授誤作援

灌志文徵附載

勘誤表

第五十四頁 第二行第十四字 弗誤作腹

同 第十行第九字 辱誤作尋

同 第二十一行第二十二字 添誤作漆

同 第二十二行第二十四字 爰字衍

第五十五頁 第十一行第十七字 有誤作於

第五十六頁 第十二行第二十五字 外誤作水

第五十七頁 第八行第二十四字 王誤作五

同 第十五行第二十八字 蹤誤作縱

同 第二十行第十九字 有誤作於

第五十九頁 第十六行第十字 梅誤作侮

同 第十七行第十四字 王誤作玉

第二頁 第四行第八字 瀾誤作潘

第四頁 第四行第二十九字 名誤作民

同 第十四行第二字 權誤作灌

同

同

同

同

同

同

同

同

同

同

同

同

同

同

同

同

同

同

同

同

同

同

同

同

同

同

同

同

同

同

同

同

同

第六頁 第二行第十四字

雪誤作雲

同 第二十二行正文

生擒二字誤倒

同 第八頁 第十四行第十五字

性誤作於

同 第二十行第十八字

始誤作治

同 第九頁 第二十一行第七字

侯誤作候

同 第二十一行第二十九字

馳誤作弛

第十頁 第十五行正文

生字衍

第十一頁 第六行正文

多一五字

第十三頁 第七行正文

悴誤作淬

同 第十四行第二十字

恂誤作徇

第十四頁 第十三行第一字

往誤作住

第十五頁 第三行第二十一字

于誤作予

同 第二十一行第十二字

偵字誤偵

第十八頁 第四行第七字

容誤作客

灌志文徵附載

勘誤表

三

同 第二十頁 第七行第十五字

巘誤作堪

同 第二十一行正文

君誤作居

第二十二頁 第十七行正文

逆妻二字誤倒

第二十三頁 第七行第十五字

援誤作授

第二十四頁 第一行第二十三字

宵誤作霄

同 第十四行第二十一字

粟誤作粟

第二十五頁 第十七行第十九字

慰誤作尉

第二十七頁 第八行第二十九字

慕誤作墓

同 第十五行第二十四字

復誤作夏

第二十八頁 第十五行第十一字

裕誤作格

同 第十九行

陣誤作碑

第二十九頁 第五行第二十九字

伐誤作代

同 第七行第十四字

孫誤作生

第三十二頁 第十六行第一字

幔誤作慢